

Službene novine Federacije BiH, broj 61/18

Na osnovu člana 42. stav (2) Zakona o evidencijama u oblasti zdravstva ("Službene novine Federacije BiH", broj 37/12), federalni ministar zdravstva donosi

PRAVILNIK

O OBLIKU I SADRŽAJU OSNOVNE MEDICINSKE DOKUMENTACIJE

I. – OPŠTE ODREDBE

Član 1. (Predmet)

(1) Ovim pravilnikom bliže se uređuje oblik i sadržaj osnovne medicinske dokumentacije.

(2) Osnovna medicinska dokumentacija, koju koriste zdravstvene ustanove, nosioci privatne prakse, zdravstveni radnici i zdravstveni saradnici prilikom pružanja zdravstvene zaštite, predstavlja osnovni izvor podataka za evidencije i osnov je za upis određenih činjenica u evidencije utvrđene Zakonom o evidencijama u oblasti zdravstva ("Službene novine Federacije BiH", broj 37/12), kao i propisima donesenim na osnovu tog zakona.

(3) Podaci iz medicinske dokumentacije spadaju u lične podatke o pacijentu i predstavljaju službenu tajnu.

Član 2.
(Vođenje osnovne medicinske dokumentacije)

(1) Vođenje osnovne medicinske dokumentacije i unos podataka u osnovnu medicinsku dokumentaciju isključivo obavljaju zdravstveni radnici, zdravstveni saradnici kao i druga fizička lica koja u okviru svoje djelatnosti obavljaju poslove iz oblasti zdravstva u skladu sa zakonom.

(2) Medicinska dokumentacija iz stava (1) ovog člana vodi se u pisanom i elektronskom obliku saglasno Zakonu o evidencijama u oblasti zdravstva.

Član 3.
(Stručni medicinski rad)

Vođenje osnovne medicinske dokumentacije u oblasti zdravstva, u smislu ovog pravilnika, sastavni je dio stručnog medicinskog rada zdravstvenih ustanova, nosioca privatne prakse i drugih pravnih i fizičkih lica koja u okviru svoje djelatnosti obavljaju poslove iz područja zdravstva.

II. – OSNOVNA MEDICINSKA DOKUMENTACIJA

Član 4.
(Osnovna medicinska dokumentacija)

(1) U oblasti zdravstva ustanovljava se slijedeća osnovna medicinska dokumentacija:

a) zdravstveni karton pacijenta:

1) zdravstveni karton pacijenta u porodičnoj medicini,

2) zdravstveni karton medicine rada,

- 3) zdravstveni karton predškolskog djeteta,
 - 4) zdravstveni karton školskog djeteta,
 - 5) zdravstveni karton studenta,
 - 6) zdravstveni karton žene,
 - 7) stomatološki karton,
 - 8) karton korisnika centra za mentalno zdravlje,
- b) karton obavezne imunizacije,
 - c) protokol bolesnika,
 - d) matična knjiga lica smještenih u bolničkoj zdravstvenoj ustanovi,
 - e) historija bolesti,
 - f) temperaturno-terapijsko-dijetetska lista,
 - g) lista anestezije,
 - h) otpusno pismo,
 - i) lista kliničkog puta pacijenta,
 - j) karton zdravstvene njege,
 - k) karton polivalentne patronažne zdravstvene njege:
- 1) PAT 1 Patronažni karton porodice,
 - 2) PAT 2 Sestrinska anamneza,

- 3) PAT 3 Karton zdravstvene njege trudnice,
- 4) PAT 4 Karton zdravstvene njege porodilje,
- 5) PAT 5 Karton zdravstvene njege novorođenčeta i dojenčeta (0-12. mjeseci),
- 6) PAT 6 Karton zdravstvene njege predškolskog djeteta (1-5. godina),
- 7) PAT 7 Karton zdravstvene njege školskog djeteta (6-18. godina),
- 8) PAT 8 Karton zdravstvene njege oboljelog od maligne bolesti,
- 9) PAT 9 Karton zdravstvene njege oboljelog od dijabetesa,
- 10) PAT 10 Karton zdravstvene njege oboljelog od hronične bolesti,
- 11) PAT 11 Karton zdravstvene njege oboljelog od tuberkuloze,
- 12) PAT 12 Nalog za posjetu patronažne sestre/tehničara,
- 13) Ostala dokumentacija:

Plan patronažne njege–

Protokol planiranih posjeta patronažne sestre/tehničara–

Izjava o odbijanju posjete patronažne sestre/tehničara–

Obrazac prijave incidentne situacije i obrazac analize incidentne situacije–

Preporuka centru za socijalni rad–

Status lokalne zajednice - spisak učesnika.–

l) karton akušerske zdravstvene njege,

m) knjige:

- 1) knjiga evidencija zaraznih bolesti,
- 2) knjiga evidencije o proizvodnji, prometu i potrošnji opojnih droga,
- 3) knjiga evidencije o potrošnji opojnih droga u zdravstvenim ustanovama,
- 4) knjiga evidencije o sterilizaciji.

(2) Sadržaj osnovne medicinske dokumentacije iz stava (1) ovog člana utvrđen je u Prilogu 1. ovog pravilnika i čini njegov sastavni dio, izuzev tačke b) stav (1) ovog člana i tačke m) podtač. 1) i 2) stav (1) ovog člana.

(3) Sadržaj kartona obavezne imunizacije (vakcinacija) iz tačke b) stav (1) ovog člana propisan je Pravilnikom o načinu provođenja obavezne imunizacije, imunoprofilakse i hemoprofilakse protiv zaraznih bolesti te o licima koja se podvrgavaju toj obavezi ("Službene novine Federacije BiH", br. 68/16 i 16/17).

(4) Sadržaj knjige evidencija zaraznih bolesti iz tačke m) podtačka 1) stav (1) ovog člana propisan je Pravilnikom o načinu prijavljivanja zaraznih bolesti ("Službene novine Federacije BiH", broj 101/12).

(5) Sadržaj knjige evidencije o prometu i potrošnji opojnih droga iz tačke m) podtačka 2) stav (1) ovog člana propisan je Zakonom o apotekarskoj djelatnosti ("Službene novine Federacije BiH", broj 40/10).

Član 5.

(Zaštita ličnih podataka)

Na pitanja prikupljanja, obrade i davanja ličnih podataka sadržanih u medicinskoj dokumentaciji primjenjuju se odredbe Zakona o zaštiti ličnih podataka ("Službeni glasnik BiH", br. 49/06 i 76/11).

Član 6.
(Korištenje podataka)

Podatke sadržane u medicinskoj dokumentaciji mogu koristiti i pojedinci na koje se ti podaci odnose radi ostvarivanja svojih prava u skladu sa posebnim zakonima.

Član 7.
(Rokovi za čuvanje medicinske dokumentacije)

Medicinska dokumentacija čuva se 10 godina od posljednjeg unosa podataka, osim stomatološkog kartona koji se čuva trajno i zdravstvenog kartona i historije bolesti koji se čuvaju 10 godina nakon otpuštanja pacijenta iz bolnice.

Član 8.
(Oblik medicinske dokumentacije)

Zdravstvene ustanove i nosioci privatne prakse čuvaju medicinsku dokumentaciju u pisanom i elektronskom obliku u skladu sa propisima o zdravstvenoj zaštiti i Zakonu o arhivskoj građi Federacije Bosne i Hercegovine ("Službene novine Federacije BiH", broj 45/02).

III. – PRELAZNA I ZAVRŠNA ODREDBA

Član 9.
(Instrukcija za usklađivanje)

(1) Zdravstvene ustanove, kao i nosioci privatne prakse obavezni su uskladiti svoju medicinsku dokumentaciju saglasno odredbama ovog pravilnika, a prema instrukciji Zavoda za javno zdravstvo Federacije Bosne i Hercegovine.

(2) Instrukciju iz stava (1) ovog člana Zavod za javno zdravstvo Federacije Bosne i Hercegovine donosi u roku od tri mjeseca od dana stupanja na snagu ovog pravilnika, uz prethodnu saglasnost federalnog ministra zdravstva.

Član 10. **(Stupanje na snagu i primjena)**

Ovaj pravilnik stupa na snagu osmog dana od dana objavljivanja u "Službenim novinama Federacije BiH", a primjenjivat će se od 01.01.2019.godine.

Broj 01-37-3575-1/18
31. jula 2018. godine
Sarajevo

Ministar
Doc. dr. **Vjekoslav Mandić**, s. r.